
МҲЙНАЛИ МАТО КЕРАКМИ? ФАРҒОНАГА КЕЛИНГ!

Қўқон эркин иқтисодий зонаси таркибидаги “ММА Камтар Бегойим” МЧЖ мўйнали мато ишлаб чиқаришни йўлга қўйди.

- Хитойдан 350 минг долларга технологик ускуналар сотиб олдик ва созлаш-ўрнатиш ишларини тугаллаб маҳсулот чиқара бошладик, - дейди тадбиркор Исроилжон Абдуллаев. - Бу аввало яна 40 та янги ишчи ўрни дегани.

Сунъий мўйнали мато шу пайтга қадар мамлакатимизга импорт қилинар эди. Унга пойафзал, мебел саноатида эҳтиёж катта. Энди у Фарғона вилоятидан етказиб берилади.

- Биз ўнлаб пойафзал корхоналари ва яқин хорижий мамлакат тадбиркорлари билан экспорт шартномаларини туздик, - дейди Исроилжон Абдуллаев. - Шу йилнинг ўзида жами 1 млн АҚШ доллари миқдорида экспорт қилмоқчимиз.

Фарғона вилояти ҳокими Шухрат Ғаниев янги маҳсулот ишлаб чиқариш йўлга қўйилиши муносабати билан унинг тантанали очилиш тадбирида иштирок этди.

- Биз бу каби тадбиркорни бошимизга кўтарамиз, уни ҳар жиҳатдан қўллаб-қувватлаймиз, - деди вилоят раҳбари.

“ММА Камтар Бегойим” МЧЖ яқин келажакда мўйнали матодан ёпқич (одеял) ишлаб чиқармоқчи.

Шухрат Ғаниев карантин қоидаларига риоя қилган ҳолда фаолият кўрсатаётган корхона ишчилари билан суҳбатлашди.

- Қўқон эркин иқтисодий зонаси туфайли яратилган имтиёзлардан фойдаланган корхонамиз йилдан-йилга кенгайиб, иқтисодий жиҳатдан мустақамланмоқда, - деди ишчи Манзурахон Отахонова. - Шу ҳудуддаги ҳар бир оиладан икки, ҳатто уч нафар одам шу ерда ишламоқда. Бундай шароит яратиб берган Президентимизга раҳмат.

Фарғона вилояти ҳокимлиги Ахборот хизмати

2020-08-13 20:51:44